

WG 35.5.170

10

M A R W N A D

Y diweddwr

**BARCH. MICHAEL ROBERTS,**  
**PWLLHELL.**

*Bu farw Ionawr 29, 1849, yn 68 oed.*

**A** WEN Cymru cywilyddia,  
 Pa le huost yn ymdroi?  
 Er pan hunodd MICHAEL ROBERTS  
 Mae blyneddau wedi ffoi.  
 Cenaist alarebau llyfnion  
 I rai dinod yn eu dydd:  
 Gwelaist gladdu Seraph Cymru  
 Heb un deigrin ar dy rudd!  
 MICHAEL ROBERTS! mae di enwi  
 Yn agor beddau 'r fynwes hon,  
 Ac yn codi hen adgofion  
 I ymrithio ger fy mron:  
 Wyf fel gwr mewn gweledigaeth  
 Yn ail dreulio boreu f'oes  
 Yn mysg dylanwadau nerthol  
 "Yr ymadrodd an y groes."  
 Llauer gwyneb welaf yma  
 Yn siriol wenu arna' i 'n awr,  
 Roddwyd er's blynyddau bellach  
 Yn mhridd wely oer y llawr:  
 Teimlo'rwyf yr hen odfeun—  
 Teimlo'r avel yn yr hwyl—  
 Clywed adsain cân a moliant,  
 "Fel llais tyrfa'n cadw gŵyl."  
 Taener clodydd John Elias—  
 Sonier am ei ryfedd ddawn—  
 Casgler-holl engreifftiau Cymru  
 O hyawdledd nerthol, llawn:  
 Gwell i mi oedd dawn trydanol  
 Gwrthrych yr alargerdd hon,  
 Medrai ef y ffordd i gelloedd  
 Dyfnaf, t'wllaf dan fy mron.  
 Nid oedd neb yn nyddiau'm hieuenctyd  
 Garwn glywed fel efe,  
 Pan agorai ei wefusau  
 Teimlwn Dduw yn llenwi 'r lle,

*Gyda chefnidder uchaf yn awduw a l*  
*W. J. Mellen - Llansyffordd*

Y 205 314251

Drychfeddyliau yn disgleirio  
 Drwy 'r ymadrodd treiddiol, mwyn,  
 Nes oedd creigiau hen galonau  
 Yn ymollwng dan y swyn.

Nid drwy floedd, a geiriau gweigion,  
 Y cyrhaeddodd y fath radd.

Nid oes niwed mewn taranau,  
 Y mellt distaw sydd yn lladd.

Yr oedd swyn ei ddoniau esmwyth  
 Fel awelon rhwng y dail,  
 Medrai ysgwyd teimlad plentyn  
 A'i gydwybod bob yn ail.

Nae dychymyg eto 'n clywed  
 Yn nghlogwyni *Ebal* draw,  
 Adsain hir y llais effeithiol,  
 Fu 'n cydrwymo myrdd mewn braw:  
 Pan gyhoeddai 'r addewidion  
 Ar *bob gair* gosodai swyn,  
 Y mae heulog fryn *Garizim*  
 Byth yn anwyl er ei fwyn.

Cofir rhai odfeuron rhyfedd  
 Yn yr hen Gymdeithasfau,  
 Gan rhyw luoedd yn y nefoedd  
 Gawsant ynddynt eu bywhau:  
 Pan y torai 'r cwmwl tanllyd  
 Uwch ben y gynulleidfa lawn,  
 Myrdd mewn gwasgfa am eu bywyd  
 Yn cyd waeddi "Beth a wnawn?"

Cofir byth yr oedfa hynod  
 Yn nghymanfa Dimbych gynt,  
 Pan y plygai 'r gynulleidfa  
 Fel y goedwig dan y gwynt:  
 Gwelai 'r dorf y farn yn eistedd—  
 Bydoedd yn llesmeirio 'nghyd—  
 Ond y dyn drwy ras yn sefyll  
 Ger bron Barnwr mawr y byd.

Bu yn wasanaethwr ffyddlon  
 I'r *Trefnyddion* lawer blwydd,  
 Tynodd atynt gorff y werin  
 Drwy ei anghydmarol lwydd:  
 Cyn bod adeiladau mawrion,  
 Cyn i'r miloedd amlhau:

Eraill sydd yn awr yu medi  
 Lle bu ef yn diwyd hau.  
 Ni chyfodid un disgwyliad  
 Drwy ei olwg wledig iawn,  
 Oni buasai 'r llygad tanllyd  
 Yn bradychu trigle 'r dawn:  
 Dan y symledd gwledig isel  
 'Roedd aeddfedrwydd barn a dysg,  
 Wnaeth i lawer coeg ymhonwr  
 Deimlo'i bwysau yn ein mysg.  
 Myfyrdodau dwfn diorphwys,  
 Pryder meddwl, llafur mawr,  
 Oeddynt ormod baich i natur—  
 Suddai dan y pwys i lawr.  
 Chwarddai Uffern, wylai Seion,  
 Synai 'r Byd at drefn y Nef,  
 Pan y d'ryswyd y cylymau,  
 Rhwng ei gorph a'i feddwl ef.  
 Bu y cysegr sancteiddiolaf  
 O dan len dros lawer blwydd,  
 Tad yn Nghrist, i lawer enaid,  
 Fel yn blentyn yn ein gwydd:  
 Mor aneglur yw bwriadau  
 Dirgel droion trefn y Nef,  
 Arbed doniau gwyr cyffredin,  
 A charcharu 'i ddoniau ef.  
 Bum mewn tristwch pan yn edrych  
 Ar adfeilion palas gwych,  
 Gwel'd colofnau wedi cwmpo  
 A'r cerfiadau 'n wael eu drych:  
 Felly gwelwyd MICHAEL ROBERTS,  
 Teimlwyd ger ei fron yn brudd,  
 Chwyddai 'r fynwes gan ei thristwch,  
 Gwelwyd deigrin ar bob grudd.  
 Ond datodwyd ei gadwynan,  
 Cyn ei farw daeth yn rhydd,  
 Gwelwyd ef uwch ben y dyrfa  
 Cyn machludo haul ei ddydd:  
 Yr hen ddawn ganmolai 'r tadau  
 Glybu 'r meibion wrth eu bodd,  
 Daeth fel comed drwy 'r wybrenau  
 Dros ychydig—yna ffodd.

Darfu 'r llafur, darfu 'r lludded,

Darfu profiad oriau prudd

Mae y deigr ddafnau olaf

Wedi rhedeg dros ei rudd:

Mud yw 'r geau fu 'n cyhoeddi

Addewidion fel y mêl,

Mae cyfryngau 'r pur hyawdledda

Hyd y farn i fod dan sêl.

Dymunasem wel'd ei ysbryd

Yn cyrhaeddyd y Nef draw,

Mil o olygfeydd newyddion

Yn ymagor ar bob llaw!

Hen gyfeillion yn ymgasglu

P'w groesawu ef y'ng hyd,

Gan adgoffa hen odfeun

Gafwyd yma yn y byd.

Ond er cystal oedd cyfeillach

Plant yr anial yn y Nef,

Sylwedd mawr ei weinidogaeth

Aeth a'i holl feddylfryd ef:

Syllai, synai, plygai, molai,

'N ddiarwybod iddo 'i hun,

Pan y cafodd gyflawn olwg,

Ar Fab Daw—gwaredwr dyn.

Gorphwys, gorphwys hen Bererin,

Cwsg i ben dy felys hun,

Nes daw Crist i'th alw i godi

Ar ei ddelw hardd ei hun.

Ni bydd ol y bedd na phechod

Nac un nychdod ar dy wedd,

Ti gei ganu buddugoliaeth

Ar adfeilion oer y bedd.

Mae ei enw 'n perarogli

Eto yn eglwysi 'n gwlad,

Fe gyfeirir ato heddyw

Gan ryw luoedd fel eu Tad:

Carant adrodd ei bregethau,

Carant son am lawer gwledd,

Carant sw'n llyth'renau 'i enw,

Carant edrych ar ei fedd.

W. AMBROSE, PORTMADOC.